

TSH 1,000/=

Kimalila

Tuhamini lugha zetu

Utupango utwa Shimalila

Kitabu cha hadithi za Kimalila



Utupango utwa Shimalila

Kitabu cha hadithi
za Kimalila

Huduma ya Kutafsiri Biblia
na Kuendeleza Lugha za Asili, Mbeya
S.L.P. 6359, Mbeya, Tanzania
literacy_mbeya@sil.org

Pamoja na
SIL International



Utangulizi

Huduma ya Kutafsiri Biblia na Kuendeleza Lugha za Asili, Mbeya ilianza tarehe 23 Julai 2003. Ilianza kwa ushirikiano kati ya viongozi wa makanisa na mashirika mbalimbali na SIL International.

Kusudi letu ni kuwahudumia watu wa makabila yafuatayo: Wabena, Wabungu, Wakinga, Wamalila, Wandali, Wanyakyusa, Wanyiha, Wasafwa, Wasangu na Wavwanji.

Lengo letu la kwanza ni kuyafikia makabila hayo kwa Neno la Mungu (Biblia) katika lugha zao kwa sababu tunaamini MUNGU ANAONGEA LUGHA ZOTE!

Lengo letu la pili ni kuwaheshimu watu wa makabila haya kwa njia ya kuwafundisha kusoma na kuandika lugha zao (Idara ya Kusoma na Kuandika Kilugha).

Sera ya Utamaduni ya Tanzania inasema hivi:

3.2. Lugha za Jamii

Lugha za jamii ni hazina kuu ya historia, mila, desturi, teknolojia na utamaduni wetu kwa jumla. Aidha, lugha hizi ni msingi wa lugha yetu ya taifa, yaani Kiswahili...

Kichwa: Utupango utwa Shimalila (Malila Story Book)

Lugha: Kimalila

Michoro: Willy Mwampamba

Waandishi: Willy Mwampamba, Mch. Alison Mwasile,
Mch. Yohana Mgandilwa

Toleo la tatu © 2008 - 2013 - 2015 SIL International


Ulubhaatikho ulwi shitaabu ishi

Itaawa ilya khapango	Ukulaasa
1. AKHAPANGO AKHA NTUMBILI	1
2. AKHAPANGO AKHA KALULU NU CHUULA	4
3. AKHAPANGO AKHA MUNAALO UWA PHEMBO	8
4. AKHAPANGO AKHA NZEEMELA	10
5. AKHAPANGO AKHA BHALINDU BHATATU	13
6. UMUNTU UWI GUNILA ILYI MPONZO	16
7. AKHAPANGO AKHA KALULU NI NJEEJE	18
8. AKHAPANGO AKHA BHUBHI NU KALULU	21
9. AKHAPANGO AKHA BHANTU BHABHILI	24
10. AKHAPANGO AKHA MBIIDA	27
11. AKHAPANGO AKHA NSHOOLANYO	29

1. AKHAPANGO AKHA NTUMBILI

Imandi áliipo umuntu itaawa lyakwe áali wu Ntumbili. Áali muntu mukhata nimfwa ingati maanyi khooni. Atakhalimaga khaala, inyumba yoope atámile nayo khaala. Amenda goope gámutolile kukala, akhakatwaga ge abhanji bhagaleshile. Vwope ivwa kugonela vwámile naavimo. Shoope ishitala ágombile ishisimikha. Isiku limo akhashipimbila pa mpanda zye ábaniye, akhasaamizya mu nyumba iyinji ye akhanda kugona. Lyámile ligwila lya muntu we akhafwa, ye akhapwanila.

Lyoli mwebheya uNtumbili akhapangwi khaakwe khakasesya. Kwe kuti iweene we abhanji bhakuyagaata ku vwizi, iweene pe akhaswampaga kupanda amagaali. Akhayikwinaga akhatinji, “Yooli ishi pe inkuyinogola leelo mu magaali mwebheya, inge gaatala kupimba imingaga.”



UNtumbili áamile ni mbombo iya kusesya abhantu. Pe aabhala akhasesyaga abhantu, bhakhasekhaga lyonti bhũulo lye alonga paka amiino amayego gakhalekhaga. Iweene akhatinji wiila bhũulo atibhe she mwana mutunta bhũulo, fwani akukula. Akhaaga isiku limo umwoyo wakuti Ntumbili yeega umushi. Akhatala kuleganya, aleganye mansi, umwoyo wamusopile bhũulo. Akhayibhuziilizya akhati, “Ishi inhonzye bhuli?”

Akhayikwina akhaaga atali nakho naakhamu khe aganzila umulindu uwa kwegu. Akhati, “Zye nayimba mansi ipa, injeele yitibhombwe. Ishi isuuti intiyaazimwe kwa Nyimvwi, ishilyatu kwa Sũbha, jibha inkofwela kwa Cholobhiile, amagalaazi intiyazimwe kwa Kasyusyũ, isaala kwa Nyaabhu.” Akhabha she akuyikwina kwonti kwe atiyazimwe akhantu khe akwanza. Akhakumbukha kuti uNg’ombe ali ni mbulangeeti inyinji, akhabhala kwazimwa. We akwazimwa akhati, “Weeya nalamba indi na bhajeni abhasisya nimfwa, naazimwe ishigonelo shaakho.” Iwua kuteleshela intipimbe vimo kwa maayi, ni vwa kukwa ivwo vwe amanyile uyise waani wũyo, akhampaapaga ashi!

Akhati, “Umulindu inge ukwanza akwitishe, ubhanje na khakangaali. Kwe kuti akhayinga akha kupela we ukubhala kumuyaatila kukwabho.” UNtumbili we akwina injeele zyakwe izyo akhawaga vwonti vwe ápanjile kwazimwa. Akhabhala kwanza umulindu uwa kwegu, akhamwaga kwa Sasyaka kwa muntu wa bheene uMbila.

Bhakhimvwana nu mulindu ula, we áamile mwana wa Timiziya. Akhalonga nawo bhakhimvwana. Pe umulindu akhatala kuyibaada pa bhamwabho akhati, “Yooli namwaga umusakhaala umwinza. Khabhili ali ni saala pa nyooobhe, kwi twe inkofwela inzeli, isuuti nu mbili, akujendela akhakangali, kwe kuti akhayinga.” Umulindu ula akhasekha akhati, “Hee hee! Bhanga bhayaaya! Mwana wa Ntumbili akwatile akhalyatu khakulama khakuti mwalumwalu.” Umulindu inge amwenya uNtumbili na kugeenya amagalaazi kumiiso kwa musakhaala waakwe pe akhafwanga nziila. Pe likhafikha isiku, bhakhimvwana kukwesana, uNtumbili nu

mūlindu waakwe. We kwabha nakhamvwelelema, akhiisi khakuti khagwanje, bhakhafikha pi gwila lya Ntumbili.

ŪNtumbili akhati, “Weeya mushi waani, ishi pe twafikha, uyimvwaje ngati uli kukwinyu.” Ūmūlindu kwinda kwinjila mu nyumba, áyaajile bhiibhii! Naakhamu khataliipo mwenemwo, shili shiishitala ishibanila. Ábhiishile pamwanya pa mapanda ungati lipagali lya muntu umufwe. Ūmūlindu ku mwoyo akhati, “Bheebhee! Nasheela bhuli nu maayi bhanamwe.”

ŪNtumbili akhamubhūzuya uyise waakwe nu nyina waakwe akhati, “Nu mwana wiinyu intulile inongwa, ineejile umūlindu umaama wa Mbila, umwana wa Timiziya, uwi nyumba insongo.” Unyina wa Ntumbili itaawa áamile wu Naluswigo, akhaswiga akhati, “We mwana weewe we! Ntumbili, uli na khooni baaba, khe utikwele umūlindu waakho? Atilyanje akhooni, wubhanji ugaganile amagali?”

She ŪNtumbili ashili kugalusya lyolyonti kwa nyina waakwe, uyise waakwe akhatoneela akhati, “Imbale kwoshi, Nkuviitwa? Bhebheyoo! Ee maanyi, utulile inongwa! Zye ukubhūzuya unaanu? Wumuntungwa ukhakhana kulima bhanga utikwe imigaali ni mifuuku ye ukushimbilila kupimba?”

Pe indaabhi we kwasha, bhaala bhe bhamwazimwizye, bhakhatinji, “Aloo! Khala khantu bhuli?” ŪNtumbili akhafumwaga bhūlo. Bhakhapimba vwonti peeka ni mbulangeeti zye ŪNtumbili áyanziye umūlindu. Bhakhinzaga kwega weeka weeka.


Ūmūlindu we aalola zye zyahombekha, ku mwoyo waakwe akhati, “Ipa te pa kwikhala khaala.” Akhaamula kusogola akhati, “Kwomo injisogolele kukwitu nu Nyimvwingwa. Poope inge impatile ulwanda inhayilolelaje. Nakhabhili kukwitu akhantu khokhonti khaliipo na pakugona pinza nimfwa. Ne woomo, she mulame mansi naswila pa lwinga kwinda awinda.” Akhayilumbūzuya nimfwa umūlindu wa bhantu.

Weeya, utakhabhe inza ŪNtumbili. Ūwakhata wakhatozuya nu mushi. Khabhili umwana wa bhantu akhalamaga pamiiso ni ndongo bhūlo yali nyinza.

2. AKHAPANGO AKHA KALULU NU CHUULA

Isiku limo uKalulu akhamulaga umushi na bhaana bhaakwe akhati, “Naabhala ku mbombo.” Pe we aafikha pi dala, akhakwina nhaani imbombo iya kubhomba, akhaaga zyonti ngomu, akhalyaga idala ipupuusu. Akhanza uchuala akhabhala kwa muntu umo ku nsi yiila ye afishiiye. Akhalaabha uwugono kwa muntu uyo, umuntu ula akhamupa. UKalulu akhabhuzilizya akhati, “Indi nu chuula mumanyani waani agone kwoshi?” Umuntu ula akhagalusya akhati, “Jibha agone kwe inkuku zikugona.”

Umwenenhaaya akhamubhiikha uchuala kwe inkuku zikugona. Uwusiku pakaasi uKalulu akhadaamukha, akhamulema uchuala akhamutumbulanya. Amabhanda akhapakha kwi lomu lyi nhanda nu wula akhabhiikha mu lapoolo lwi nhanda yiila. We bhadaamukha ishilaabhila, uKalulu akhamusalifwa umwenenhaaya ula akhati, “Ishi nasogola lyoli indaabhe uchuala waani.” Umuntu ula akhabhala ku nkuku zyakwe, akhaaga yikulolesya kuti inhanda yaakwe yiliye wenewo. Pe akhamubhuziya uKalulu akhati, “Inkuku yiliye wenewo.” UKalulu akhagalusya akhati, “Fwani inkuku yaakho yiliye!” Akhazeemela kuti, “Nampe uchuala waani.”



Umuntu ɔla akhakwina kwe atimwaje uchɔula akhapootwa. Pe akhati, “Weeya, jibha yeegaga inhanda ye yiliye uchɔula waakho.” ƐKalɔlu akheega inhanda akhasogola nayo kwe akubhala.

We ajenda, aafikha ukutali, yikhafikha shalyabheela akhalaabha ɔwugono kwa muntu ɔwamwabho winza. Umuntu ɔla ɔamili ni mbuzi inyinji, akhɔtikha kumugonia. ƐKalɔlu akhati, “Inkukulaabha weeya inkuku yaani ini yigone ni mbuzi zyakho kwe zikugona.” Umuntu ɔla akhayipimba inhanda yiila, akhayibhikha kwe imbuzi zikugona. We kwafikha uwusiku panhati, ƐKalɔlu akhadaamukha, akhabhala ku shijili shi mbuzi. Akhayilema inhanda yaakwe yiila, akhabhoola, akhoosha inyama. Uwusiku wuwuula akhalya yonti, akhamala amagala nu wula akhabhikha mu shijili ishi mbuzi. Uwula wumo akhabhikha mu mpembe zyi mbuzi imvuliisi impiti kushila zyonti, akhabhala winza kugona.

We kwasha indaabhi, akhagoneelela. Fwani uwusiku aamili ni mbombo impiti. Ɛmwene nyumba akhamudaaumya, ƐKalɔlu akhadaamukha. ƐKalɔlu akhtatala kumusalifwa ɔmwene nyumba ɔla akhati, “Weeya wasalipa nimfwa, we wangonia mu nyumba yaakho. Ishi jibha umpe inhanda yaani.” Umuntu ɔla akhabhala kwe imbuzi zikugona, akhaaga inhanda yiila niimo. Akhanza mwonti, akhapootwa. Akhalola imvuliisi yimo yili nu wula mu mpembe zyakwe ni bhanda limo lili paasi pa shijili. Akhamubhuzya ƐKalɔlu akhati, “Weeya, inhanda yaakho maanyi khooni khe khaliye. She tumanyile imbuzi zitakulya inyama khaala, ileelo akhantu nyeene khaleshile uwula ni bhanda.” ƐKalɔlu we ayimvwa shiniisho akhabha mukhali akhati, “Inkwanza inhanda yaani umpe shiniishi! Khabhili yaamile mpiti anzi mvuliisi yaakho ini ye yili nu wula mu mpembe.”

Umuntu ɔla akhayikwina nimfwa akhati, “Weeya, we wabha, we mukhali nhaani ukuti jibha neene indiiye! Jibha pe bhalaga ni mvuliisi yiniini ye nakusomba.” ƐKalɔlu akhasha nimfwa, akhapinya imbuzi yiila, akhasogola nayo. Mwi dala akhayilongaga mwene bhulo kuti, “Injeele lye lidala ilyinza ilya kukabha ishuma. Uchɔula apaapa inhanda, inhanda yapaapa imbuzi imvuliisi.” Akhajendelela kujenda ni mbuzi yaakwe paka kukhabha

shalyabheela. We izubha lyaswa, akhalita nhaani akhanda kulaabha uwugono kwa muntu uwamwabho. Umuntu ula áamile ni ng'ombe inyinji nhaani. Akhamupa uwugono, bhakhanga nimfwa, akhamupa uKalulu ishaakulya. Pe uKalulu akhati, "Imbuzi yaani yilubhiye kugona ni ng'ombe. Inkakulaabha muntu we, kuti imbuzi yaani yigone ni ng'ombe zyakho!" Umuntu ula akhiitikha akhayitwala ku ng'ombe zyakwe akhayikunga. UKalulu akhagona mwene na bhenenhaaya bhakhagona bheene. UKalulu inza she alubhiye, akhadaamukha shawusiku, akhabhala mu shijili shiila, akhayipiita imvuliisi yiila ku nsingo, akhayibhoola. Akhabhoolanya shakhashaakha bhulo, akhapimba inyama yimo, akhafisa kwi dala lye atishile, yimo akhataaga, akhalya nyishe bhulo. Ikembe akhabhiikha pa nhambaku impiti kushila zyonti. Akhapakha ni bhanda kwi lomu lyi nhambaku yiila, inge akhatinji ye yiliye imbuzi yaakwe, inge apimbe yeneyo.

Indaabhi akhalaabhila ni shilaabhila mpwi, akhamubhuzya umwenenhaaya kuti, "Inkulaabha imvuliisi yaani inkwanza kusogola kwasha." Umuntu ula akhabhala mwi pijili lyi ng'ombe. We akwenya akhaaga imbuzi niimo, yooli ing'ombe yaakwe impiti yili ni bhanda kwi lomu ni kwembe lili paasi puupo. Akhatala kudwega wuuyo kuti, "Jibha ng'ombe yaani yiliye imvuliisi yaakho!" Akhiwa kuti ing'ombe yitakulya inyama khaala. UKalulu akhati, "Ine inkwanza umpe imbuzi yaani shiniishi! Ine imanyile kuti wewe uliye, ukunsyobha kuti ing'ombe yiliye. Kwanda lino ing'ombe yinzile yanda kulya imbuzi?" Umuntu ula akhati, "Jibha pe inkupe inhambaku yiniini ye yikulolesya kuti ye yiliye imbuzi yaakho." Akhamusatulila ing'ombe, uKalulu akhasha nhaani. UKalulu mwi dala akhayilonga akhati, "Umuntu umulema unu kwanda lino ing'ombe yikulya inyama, uwulema mpungo." Akhabhala ku liizi kwe kwamili ikhando, akhagoga ing'ombe yiila. Akhatiga ikhando akhasimikha ulusinda pakaasi pe atijile ikhando. Akhabhala kwanza abhantu kuti bhamwavwe kukwesa ing'ombe. Akhayibhiikha ungati yilendeeye wulendela mwi tope muula, fwani wuuyo agombile she aweenyi.

Abhantu abhinji nhaani bhakhinza kumwavwa kukwesa, iweene akhikhala pambali asungamile. Akhalilaga na mansozi akhatinji, “Mwe bhantu mwemwe, nalamba mukwesaje akhinza yitakhafwile mumwo, yagwila shiniishi nyuumi bhulo, yitafuuye khaala.”

Abhantu bhakhanda kukwesa bhakhati, “Tubhaazye kheeka, khabhili, khatatu, tutiyifumwe.” Bhakhabhaazya inza shishiila kheeka, khabhili, khatatu, hayaaa! Bhakhakwesa bhonti, bhakhagwa paasi puu! UKalulu akhakhoola inhoolo impiti nhaani akhati, “Bheebhee! Ing’ombe yaani bhaa! Mwagoga yaashi! Pe nhani mwakhaanaga kukwesa.” UKalulu akhabhala kwa mulonzi uwa bhantu bhaala, akhabhasitaaka, inongwa yikhabhatola bhonti bhe bhakhakwesaga ing’ombe yiila. UKalulu akhati, “Mwenti mukunsomba ing’ombe yeeka yeeka bhulo, we nabhatuyila.” Abhantu bhonti bhe bhábháilile kumwavwa kuzubhala ing’ombe yiila, bhakhasomba ing’ombe yeeka yeeka. UKalulu abhómbile njele bhulo, fwani ing’ombe yiila wuuyo agojile.

Akhatala kutanga ing’ombe zyakwe zye bhasomba. Pe akhabhala kukwakwe, mwi dala áshiiye inhaani akhati, “Abhalema bhe bhakulemwa na bhashevu anzi twe.” Akhabha ni ng’ombe inyinji, akhabha muntu mukabhi wa shuma kushila abhantu bhonti kusogeela yaabho. Umushi waakwe akhaswiga kwe umulume waakwe azyaga ing’ombe zyonti nalubhilo.

Akhapango khakutumanyizya kuti te khinza khaala kukabha ishuma kwi dala lye te lvinza. Khinza kubhomba mwi dala ilunjisu.

3. AKHAPANGO AKHA MŪNAALO ŪWA PILEMBO

Isiku limo abhantu bhabhili bhakhalongaga bhakhatinji, “Umunaalo uwa plembo waamala abhaana bhiitu abhasakhaala na bhalindu bhaabho bhonti.”

Umaama uSakolima, akhamubhuzyaga umaayi waani uSankonya, bháamile ku mpungo kwifalukwa. Bhakhandila umuntu we áfuuye ku Shikunga, bhakhabhala kusyila ku Magabho.

USakolima akhamubhuzya umaayi uSankonya akhati, “Umanyile kuti umunaalo uwa plembo watimale abhaana bhiitu bhonti.” Akhajendelela kulonga kuti, “Bhoope abhaana bhe twapaapa bhabha bhelengani nimfwa. Bhatakwohora inge mpungo imbiibhi mansi ye bhakulonga mu lediyo.”

Umaayi uSankonya akhati, “Lakha mandabha weewe! Ine nyene abhaani, bhe bhatindeshe shiniishi, bhatifwe bhonti bhatisile. Ishi nyene aliipo weeka we ayandile akuduvula ikosomolo kukusha mesu.”

USakolima akhalonga akhati, “Maanyi tukhonzye bhuli nabho abhaana nyene.” Iwe yeenya bhoope bhe bhaana abhasakhaala bhaatala bhakulinda mu mikooko yaabho yalini ye bhakuti imidebho. USankonya akhatoneela akhati, “Bhakwenya wusiku wonti pakhaaya, bhakwinukha we kukusha. Inhabhale kwoshi Sakolima





we, nu wugoosi wonti uwu! Wu naanu we akhayinsyila inzine nyeene?” Akhalila, akhalila.

Fwani luula we bhakulonga pa mpungo paala pe bhíkhaaye, áliipo uMwende we akhimvwaga uSakolima nu Sankonya we bhakuyilumbuzya. Anheele uMwende akhoole! Impungo yonti abhantu bhakhazumbuhana. Umwende akhati, “Mwe, bhantanda mwemwe mwe! Inongwa zye mwalonga zyanhola nhaani. Nakumbukha abhaana bhaani bhe bháfuuye uwukimwi. Umunaalo unu mwe, wutimale abhaana bhiitu bhonti.” Umwantanda uwamwabho we áamile pa mpungo paala, akhatoneela kulonga. USakolima nu Sankonya bhakhamubhuzya

uMwende bhakhati, “Jimbaga bhulo! Utilile ipeene pe bhatizyushe leelo? Akhasuuto khe khatukushile, iya kubhomba lye naalimo.” Mwebheya, mwenye umunaalo uwo plembo wutibhamale. Tushimbilile kwa Mulungu pe tutipone impungo ini.



4. AKHAPANGO AKHA NZEEMELA

Imandi áliipo umuntu umo, itaawa lyakwe áamile wu Nzeemela. Umuntu unu akhazemelaga zyonti bhulo, na zye atazimanyile. Weeya, isiku limo we bhakhagombaga amananto aga kufumiilila mu nyiizi impiti ni nyinsi, umwenyekiti akhati, “Mwebheya! Ishi mutakulola kuti shisuku shapalamila?”

Umwenyekiti we abhabhuzya abhantu bhaakwe, bhoope bhakhati, “Weeya mwenyekiti, lyoli twenti twalola kuti ishisuku shikhalambiine nimfwa, kabhili tushiili kupemba na magunda.” Bhakhamubhuziizya umwenyekiti waabho bhakhati, “Ishi wanzaga kuti tutibhuli?” Umwenyekiti akhabhagalushizya akhati, “Ine inkuti nhani twagombaga amananto she inyiizi zishiili kwizula.”

Abhantu bhonti bhakhasha bhakhati, “Weeya mwenyekiti, ilyo lye usiibhile lyanza nhaani.” Bhamu bhakhati, “Umuntu unu, imbombo zyakwe zikholiine ni taawa lyakwe.” Bhakhitinhana na lye ásiibhile bhakhati, “Angunu usiibhile inyanza nimfwa.”

Bhakhati, “Mwebheya, twenye inyizi zye zikwizula nhaani suuti.” Bhakhakwina kwanda kwa Dubhukha, lwe lwizi lwe lukwizula nhaani, inge bhakhahhalaje kwa Nkusaata. Bhonti peeka bhakhitinhana bhakhati, “She zibhe, indaabhi tukhafumaje.”

We kwasha, bhakhatala kutenga inanto kwa Dubhukha. Umwenyekiti akhabhabhuzya akhati, “Mwebheya, twenyaaje ikwi lye ligoloshile kabhili libhanje libiliganu mu mbhili.” Bhamu bhakhati, “Pa nsaato paala pe pali ikwi isangati, igolosu nhaani.” Pe bhakhabhala kutulila isangati lila, umwenyekiti akhabhabhuziizya akhati, “Mwe! Ishi ikwi liniili ligagwila kumbali yilikwi?” UNzeemela akhatoneela mumwanya bhulo akhati, “Mwe! Mwe! Mwe! Ine inkulola ikwi ili linyiizye pi syila paala.” Bhonti bhakhati, “Waatala amazeme gaakho Nzeemela, wope unu mwe!” Abhinji bhakhati, “Likubha she lisandamiliye sha ku nsaato?”

UNzeemela akhati, “Poope ine inzubhe kumwanya kwi kwi nyeene, inwe mutemangaje paasi, ine intiyenyaaje kwe likugwila. Inge likugwila ku nsaato, ine shindi kumwanya intibunshiilile kwi

syila.” Akhayibaada nimfwa akhati, “Itwe tukhalubhila na makwi, khabhili tukhayizila.”

Abhatemanji bhakhamubhuzya bhakhati, “We Nzeemela, itwe tutakwanza inongwa izya shakhashaakha.” U Nzeemela akhati, “Avwa leelo, ishi mwemwe mwati zabha? Te neene?” Akhati, “Ikwi isangati itwe tukhalimanya nhaani anziishi ili lisandamiliye ku nsaato. Heelo we likugwa, likubhukha likugwila kulusalalo. Temangaji bhulo, we likugwa anzi nkulikweselaga kwi syila, te libhale ku nsaato inga lyeka.” Umwenyekiti akhati, “Mwebheya! Umuntu unu, te tumukhole khaala, temangaji bhulo. Iweene we amanyile kumwanya kwi kwi kunukwo.”

Panaapo weeya, abhatemanji bhakhanda kutemanga, kumo impepu yoope yikuvugula na kulikwesa ikwi, likhanda kubhala sha ku nsaato. U Nzeemela woope adaajile kumwanya kulipetela kwe akwanza. We lyaneneeshela, bhe bhakhatemangaga bhakhati, “We Nzeemela, yiikha mamuntuwe!” U Nzeemela akhati, “Mwebheya mwe, inge mwalita kutemanga mukhasogolaje. Nuwamwinyu imbombo pe yimwamile kwi kwi kumwanya uku!”

Umutemanji umo akhadiba pe panenesheeye, yoope impepu yikhavugulaga, yikhalipuutilaga ikwi ku nsaato kwe lisandamiliye. Ikwi we likugwa, u Nzeemela akhapulumukha, we akhatala kulendela pa nsaato paala. U Nzeemela we aswibhile, akhamilaga ivitana paasi pa minzi. Umukwi wukhatinza pa nsaato pamwanya, imwinzi yikhasaata, yikhamusumba u Nzeemela kambali. Abhatemanji we bhamulola akutukunyukha inza kuula, umo we amanyile kusabha akhayisumba pa nsaato. Akhabhala akhamutona u Nzeemela mu minzi, akhasabha akhamubhiikha pi syila. Abhamwabho peeka nu mwenyekiti, bhakhamuposheela. U Nzeemela azilishile, shasyalile ishitana sheeka kuti afwe. Pe panaapo bhakhamutapisya. We azyukha, bhakhamubhuzya bhakhati, “We Nzeemela waalola uluzeeme lwakho?” Woope akhabhagalushizya akhati, “Mwebheya, te pakulonga ipa khaala, atabhanje mumanyani waani u Nkusabha, naabhalile. Peeka nu luzeeme lwani, ulwizi ulu lwangogaga, naalekha kuzeemela nziila.”

Mwebheya, akhapango ikha khakutamanyizya kuti tutazemelaje zyonti bhulo khaala, yooli bhanga ziila zye tuzimanyile. Mwe uluzeeme lukugoga, kabhili lukukunga.

5. AKHAPANGO AKHA BHALINDU BHATATU

Isiku limo uShaali na bhamwabho, bhakhabhala kuteenya inkwi kwi sengo. Fwani abhamwabho bhamuvitiliilwe uShaali. Bhakhatinji mumyansi ali ni lenga akubhalumanya. Amwandiiye uwamwabho umo ilenga kuti, bhamupabhiye kwi lume igoosi. Amwandiiye umulindu uwamwabho ilenga kuti, ayefwizye ulwanda mu nyumba. Gonti igo uShaali abhandiiye amalenga abhamwabho. Abhamwabho bhilamiilwe nhaani bhatili uShaali ayubhushile inongwa impiti nhaani. Abhamwabho amataawa gaabho bhámile bhabha Nsalu nu Nsanya.

Pe we bhali ku nkwi kuula, uNsalu nu Nsanya bhakhayikwina bhakhati, “Tubane ilyina tumufushile kunuuku.” Bhakhabana ilyina, bhakhamubhuzya uShaali bhakhati, “Ndabha wewe! Linga kwinjila mwi lyina umu, uyeenye ijenje she lyibhiye.” UShaali akhinjila akhaaga lishiili. Bhakhonjezya kubana paka paasi inhaani. Bhakhamubhuzya uShaali bhakhati, “Linga winza weeya.” UShaali akhati, “Khooni khe mukuti indingaje kwinjila nuneene mwi lyina umu?” Bhakhati, “Iwe weewe mutali.” We ayinjila mukaasi, bhakhati, “Twenyi lambaalala!” Bhakhaaga akwilanile mu lyina muula, bhakhanda kufushila nanaali nanaali.

We bhamufushila bhakhati, “Twalifushila, lyamile ni lenga nimfwa, likeete.” We bhagalukha kukhaaya, unyina wa Shaali

akhabhabhuziilizya akhati,
“UShaali ali kwino?”

Bhakhamwamula bhakhati, “Atili naabhala kwa nholo waani.” Bhakhalaabhila indaabhi kwe bhámufushiiye uShaali. We bhaafikha, bhakhanda kwimba ulwimbo ulwa kumulamukha. Bhakhimbaga bhakhatinji, “Walinda, walinda weeya Shaali, malenga malenga gakhakwazya.”



UShaali wope akhitishila akhati, “Eena eena mwebhayaaya!” Bhakhagalukha kukhaaya. Bhakhabhalaga insiku zyonti kulonga n̄ Shaali. Isiku limo unyina wa Shaali akhamusonteelezya umunsi wa Shaali kuti, “Fwataga mulusalo kwe uNsalu n̄ Nsanya bhakubhala, ileelo bhatakhakulole.”

UNsalu n̄ Nsanya we bhaafikha, bhakhanda kubhala kwe bhámufushiiye uShaali. Bhakhanda kwimba ulwimbo lwabho ulwa wiila. Umwana ula akhimvwa we bhakulonga n̄ Shaali. Wope akhitikhaga kufuma paasi paala pe bhámufushiiye. Umwana ula akhabhala kamubhuzya unyina kuti, “UShaali bhamufushiiye mu lyina mwe nimvwa akwitishila, akwimba n̄ lwimbo.” Unyina akhati, “Tukhalaabhile indaabhi tukhabhale tumufukule.” Ni ndaabhi we kwasha, bhakhalaabhila ishilabhila, bhakhamufukula. Bhakhabhala nawo kukhaaya. Ileelo unyina wa Shaali atakhalonga naazimo kwa Nsalu na kwa Nsanya. Pe likhafikha isiku limo unyina wa Shaali akhabhalanjila abhantu kuvuna uwulezi. We abhantu bhakuvuna uwulezi ku mugunda, iweene akhabana ilyina mu nyumba, akhamala. Akhaala ivilili pamwanya, akhatenga aminzi mwi fulila itambo.

Aminzi gaala akhagapembela paka gakhatala kusebhela ingati ga kuzujila uwugali. Pe uNsalu n̄ Nsanya bhakhinjila mu nyumba yiila, bhakhavwobhoshela mu lyina. Pe unyina wa Shaali akhaponya aminzi mu lyina muula. Bhakhapwa, bhakhakusunhana, bhakhafwa. UShaali na bhapaafi bhaakwe bhakhasaama inyumba yiila, bhakhapangulanya yeneyo, bhakhapembelela. Pakhabha libhibhi, bhakhawaala imponzo. We bhawaala, bhakhamusonteelezya uShaali kuti abhale ayeenye she zimelile. UShaali akheenyā, akhamubhuzya unyina kuti zyamela. Bhakhamubhuzya bhakhati, “Utibhalaje wiila bhulo kwenya she zikukula.”

UShaali akhabhala kwenya isiku ilyamwabho, akhaaga zyahhalalukha. Akhabhala winza akhaaga zyanda kujelekha na kubha ni salwa. We aabhala isiku ilyamwabho, akhaaga zyahhiikha uweezya. Akhabhala winza, akhaaga zyasolola. Akhabhala winza, akhaaga zyahhiikha amanhombeela. Isiku ilyamwabho akhabhala,

akhaaga zyvimba. Iwinza we akubhala isiku ilyamwabho, akhaaga zyatona, zimo zyandile na kwama.

UShaali we aabhala isiku ilyamwabho, akhaaga ikhanu likulya. Akhalibhuzya akhati, “We! Khooni khe ukulya imponzo zytu?” Lyope likhamwamula uShaali likhati, “Neene inkufukula, kumiiso inkulola na ku nhoonyo inkulola.”



UShaali akhalibhuzilizya winza, likhalonga shiisho. Akhatala kushimbila kubhala kukhaaya. We aafikha, akhabhabhuzya unyina nu yise. Pe unyina nu yise bhakhabhala bhakhalyaga ikhanu nyeene. Bhakhati, “Khooni khe ukulya imponzo zytu?” Likhati, “Neene ne inkufukula, kumiiso inkwenya, ku nhoonyo inkwenya.” Bhakhalikhoma, bhakhaligoga. Pe we lyafwa, uyise wa Shaali akhamulajizya umushi akhati, “Inyama iyo ubhale uteleshe, yimo upambule ubhiishe pa shimbeeje pamwanya.” We aafikha kukhaaya, akuti abhoole likhagalunhana, likhamulema wuuyo, likhamugoga.

Likhatelekha inyama, likhakhonzya anza she uyise wa Shaali alajiziizye. Pe umulume we aafikha pakhaaya, likhamwipulila inyama, akhanda kulya. We akulya, likhanda kulonga izi ilya paasi, kuti, “Umo akulya umushi waakwe akuti nyama.” Pe umulume akhabhuzilizya akhati, “Ukuti bhuli mushi we we!” I Khanu liila pe likhati, “Inkuti ishiizi shiila inga tukhayimala maanyi.” Likhimiilila, likhanda kulonga nhaani kuti, “Akulya umushi akuti nyama.” Pe umulume we akubhuzilizya, likhafuma kunzi, likhanda kulonga nhaani. Pe akhazyaganya kuti umushi waakwe limugojile, afuuye.

We akuti alishimbilile, likhashimbila, akhasyala akulila.

Akhapango ikha khakutumanyizya kuti umuntu inga akubhombeeye ibhiibhi niwe utatabhulizyaje khaala. Ukwinza kulolekha kuti iwe weewe mubhiibhi nhaani kushila uwubhiibhi waakwe. Ukunanjinhana injele zyakho, uweziizye kufwa nalubhilo.

6. UMUNTU UWI GUNILA ILYI MPONZO

Umwanha wumo áliipo umuntu umo bhakhatinji uNkukhaanila. Umuntu unu igaali lyámwajile mu mbalaabala apimbile igunila ilyi mponzo. We akhapelaga, igaali akhamulola, akhamutuyila nimfwa. Akhimiilikha igaali, akhamubhilishila uNkukhaanila akhati, “Iwe we upimbile igunila, nzaaga panda mwi gaali umu.”

uNkukhaanila akhati, “Sejeelezya igaali lyakho ku lubhumba uku.” Udeleefwa ula akhasejeelezya igaali ku lubhumba anza she uNkukhaanila alonga. uNkukhaanila akhazubha pamwanya pi gulugumba ni gunila lyakwe ilyi mponzo, akhinjila nalyo mwi gaali. Apimbile pa shipungo. Abhantu bhe bháli mwi gaali muula bhakhati, “We! Tula igunila lyakho lye uyikhalile munuumu mwi gaali.” uNkukhaanila akhati, “Mwe mwe! Mukwanza mumusyobhe unaanu, itwe tujendile bwana. Mukwanza intule igunila lyani inga muniibhile imponzo zyani izi. Ine inshebhile nhaani.”

Umubhombi uwa mwi gaali akhamubhuzya udeleefwa akhati, “Weeya yimiilisa igaali.” Pe udeleefwa ula akhimiilisa akhalonga akhati, “Khooni khe kulusalokwo kuli ishongo mansi?” Umubhombi ula akhati, “Napootwa nu muntu waakho uwi gunila unu, bhaati akwanza abhe she apimbile igunila pi twe na mwi gaali bhulo! Akuti bhaati inga atula lyenelyo tutimwibhile imponzo zyakwe.”

Udeleefwa akhamubhuziiliza akhati, “Bhaati khooni khe utakutula igunila inga utazyaje.” Yeenya abhamwinyu bhonti bhatuulile mwi gaali vwonti vwe bhapimbile, iwe khooni khe ukusiitila kutula?” uNkukhaanila akhati, “Khooni khe ukundambiiliza, waaga weewe upimbile, watinji impande mwi gaali lyakho inga uyande kunjimvwa? Weeya, we! Jibha pe inhiikhaje bhulo mu shigaali shaakho umu.” Akhajendeelela kulonga kuti, “Apeene she shigaali shooni shiniishi.” Akhaswila amati mwi gaali mumwo paasi akhati, “Pu!”

Udeleefwa akhabhuziiliza akhati, “Wu muntu iwe we naanu itaawa lyakho?” uNkukhaanila ula akhamugalushiza udeleefwa ula

akhati, “Itaawa lyani ne Nkukhaanila.” Iwinza udeleefwa akhati, “Ufumile kwoshi?” UNkukhaanila akhamwamula akhati, “Imfumile ku Magabho, we imbali iya kwa Kayengile.” Udeleefwa ula akhati, “Yiikha mwi gaali lyani nu mufuuku waakho.” UNkukhaanila akhiikha ni gunila lyakwe paasi, pe we akuti ajende, akhasole khakhamupinzaanya, akhagwa kukhati, “Tii!” Umugunila wukhamutitiila, akhafwa panaapo. Imponzo zyakwe zye bhakhalya pa mpungo, we bhakumulila.

Akhapango ikha khakutumanyizya kuti bhaliipo abhantu abhinji bhe bhakukhaanila kutuula imbiibhi zyabho kwa Yesu. Bhaguliye kufwa nazyo anzu Nkukhaanila.

7. AKHAPANGO AKHA BHUBHI NU KALULU

UBhubhi áamile muntu we ábholeeye bhulo. Akhaaga uwakenja watali nu lushindikho naalumo. Zye akuti alonje pa mpuga, abhantu bhakhatinji, akulonga zya wakenja. Inga bhamusebha ku mbombo yoyonti yiila abhantu bhakhatinji, “Ikenja ilyo, litibhombaje izyoni leelo?” Poponti pe akushila bhakhatinji, “Abholeeye.” Bhamu bhakhatinji, “Inga aafwa, tukhayisyiila itungululu.”

Pe UBhubhi akhati, “Imbale kwanza umushi.” We akubhala kumo, fwani kalusalo uKalulu akhalandataga. UBhubhi akhamwaga umulindu, akhalonga ku bhaayise, bhakhiitika. We akufuma mu shilyango, akhakhomaana nu Kalulu akwinjila mu nyumba. UKalulu we ayinjila mu nyumba, akhanda kuvubhanya akhati, “UBhubhi mutamulolaje shiniisho, akwatile amenda mu mbili yaakwe, áali malonda meene. Poope mwe akujenda akununha puu!” Akhabha she akulonga kuti, “Ine mupalamani waani nimfwa, uyo we muntu mupina wa kwanda pa nhaaya yiitu, ataliipo umupina anzu Bhubhi khaala.”

Fwani we uKalulu akukampanga munhati, UBhubhi áamile pa nsoso akhatejeelezyaga. Pe abhantu bhaala bhakhimvwa zye uKalulu akulonga, bhakhamukhaana UBhubhi kuti, atangeega umwana waabho khaala, yooli bhakhalola uKalulu we akhondeeye kuti agabha mukolimwa waabho.

UBhubhi we aamanya kuti zyananjika, akhabha ni mbombo iya kwanza umushi uwunji, akhanda kuzyunguula musanya wonti. UKalulu woopu uwuvubhanyi wámulemile, akhapotwaga nziila na kusupiila utulo. Inga adaamakha ni ndaabhi ishilaabhila, yáamile mbombo kubhuziilizya kwe UBhubhi abhalile. Ileelo atakhanzaga kuti bhajendaje peeka khaala. UBhubhi akhamwaga umushi uwamwabho. Isiku lye aabhala kukwa, bhakhamugojela inkuku. UBhubhi we akwanda kulya bhulo, uKalulu akhakhoma ikhoodi mu shilyango. UBhubhi we amulola, akhaponaga kuti angazilikha, umwoyo wakhati ng’aa! Akhayeetwa nhaani, akhanda kubheelula

amiiso anza we akwanza kuzilikha. Wope uKalulu we ayaaga uBhubhi akulya inkuku, ulukelo lukhanda kubhobha ingati mpungo iyi nzegema, akhayingaga na kutwinha, akhapootwa nziila kujimba. Akhabhabhuzya akhati, “Wunuyo ali ni shizilisi, mwenyaaji she akubheelula amiiso gaakwe.”

Abhantu bhaala bhakhamusiita uBhubhi, yooli bhakhamugana uKalulu kuti we abhe mukolimwa waabho. UBhubhi akhayisiibhaga na kuti jibha angayikunjila akhati, “Maanyi inhonzye bhuli nu Kalulu unu.” UBhubhi akhayilonga nimfwa akhati, “Jibha ineeje umushi kumwanya, pe angapootwa kusonganya mwe!”

UBhubhi akheega ulukusa, akhanda kuzubha kumwanya kuti abhale ayanze umushi, fwani uKalulu amile pe atizubhile. Ulukusa lwa Bhubhi lwafumile paasi paka kumwanya. Wope uKalulu akhanda kujenda mu lukusa lwa Bhubhi. UBhubhi zyamusyobhile, atamanyile kuti uKalulu angazubha mu lukusa lwakwe. We aafikha kumwanya, akhamwaga umulindu umwinza nimfwa. Bhakhitinhana kuti ayande na kukwa. UBhubhi akhasha nimfwa, akhatinji kumwanya kwe uKalulu atagabhala kuvubhanya khaala. We bhaamala bhalagana, uBhubhi we akufuma kunzi, akhaaga uKalulu akwinjila mu shilyango. UBhubhi akhagandukha nimfwa akhalonga lyeka akhati, “Umuntu unu afumila kwoshi?” UKalulu she abhalamukha bhulo, akhanda kuvubhanya. We akujendeelela kuvubhanya, uBhubhi she ali panzi atakhalaga na kulaga khaala, akhasogola, akhabhangaanya ulukusa lwakwe, akhanda kwikha paasi. Abhantu ibha bhoope bhakhamugana uKalulu, bhakhamukhaana uBhubhi we bhámwitishile kumwandilo.

Bhakhitinhana zyonti zye uKalulu alonjile bhakhati akhinzaje kukwa, bhakhalagana uKalulu akhafuma panzi. We akuti atale kwikha, akhaaga uBhubhi asogooye nu lukusa lwakwe. UKalulu akhakwina she atiyiishe paasi, akhapootwa. Pe akhanza injele iya kuti abhantu bhaala bhapote ulukusa. Bhakhapota, bhakhamupinya amakutwe. Ulukusa luula bhápotile umwezi weeka. We bhanda kumwisya akhati, “Inga nayingaana, mukhakwesaje we naaga kwe inkubhala kutali.”

We bhamupinya amakutwe, bhakhamwisya, akhaaga kutali, akhayinzanya, bhakhamuzvwa winza. Pe akhati, “Tubhalaabhe abhapalamani na bha lyanhanda kupota winza, bhakhapota umwezi weeka wukhasila.” UKalulu akhabhabhuzya abhantu bhaala akhati, “Ishi mwebheya inga nayinzanya, mukhaleshezyaje bhulo.” Bhakhamupinya amakutwe, ula we akupinya jibha akhapinya akhabhiibhi, we paabhobha uKalulu akhaviitwa, akhanda kuti, “Abhapalamani bhiinyu ibha bhakunsekha, ileelo ine intibhalonje bhafwe wu musanyu.” Abhantu bhaala bhatamuseshile naakhamu. We bhaatala kumwisya, uKalulu akheenyapaasi, akhaaga kwe akubhala kutali, akhanda kuyinzanya itwe. Abhantu bhaala bhakhakumbukha kuti atili inga nayinzanya itwe mukhaleshezyaje, bhakhaleshezya ulukusa luula. UKalulu akhalenda paasi kukhati tii! Akhazilikha, akhalaatula amiiso, goope amakutwe gakhanyuntikha gakhabha matali anzu lukusa. We pakhaabha inhaani, pe akhazyukha, kwanda panaapo uKalulu amakutwe gakhabha matali na miiso gakhabha mapiti.

Akhapango ikha khakutumanyizya kuti, abhantu abha vubhanyi na bha lakelo bhakuleeta uwufwe ni vilema mu nhaaya.

8. AKHAPANGO AKHA BHUUBHI NU KALULU

UBhūubhi áamile muntu we ábholeeye bhūulo. Akhaaga uwūkenja wūtali ni tino naalimo. Zye akūti alonje pa mpuga, abhantu bhakhatinji akulonga zya wūkenja. Inge bhamūsebha ku mbombo yoyonti yiila abhantu bhakhatinji, “Injenja ilyo, litibhombaje izyoni leelo?” Poponti pe akūshila bhakhatinji, “Abholeeye.” Bhamu bhakhatinji, “Inge aafwa tūkhayisyilila itungūululu.”

Pe uBhūubhi akhati, “Imbale kwanza umushi.” We akubhala kumo, fwani kulusalu uKalulu akhalandataga. UBhūubhi akhamwaga umulindu, akhalonga ku bhaayise bhakhiitika. We akufuma mu shilyango akhakhomaana nu Kalulu akwinjila mu nyumba. UKalulu we ayinjila mu nyumba, akhanda kuvubhanya akhati, “UBhūubhi mutamulolaje shiniisho akwatile amenda mu mbili yaakwe, áali malonda meene. Poope mwe akujenda akununha puu.” Akhabha she akulonga kuti, “Ine mupalamani waani nimfwa, uyo we muntu mupina wa kwanda pa nhaaya yiitu, ataliipo umupina inze uBhūubhi khaala.”

Fwani we uKalulu akukampanga munhati uBhūubhi áamile pansoso akutejeelezya. Pe abhantu bhaala bhakhimvwa zye uKalulu akulonga, bhakhamukhaana uBhūubhi kuti, atageega umwana waabho khaala, yooli bhakhalola uKalulu we akhondeeye kuti agabha mukolimwa waabho.

UBhūubhi we aamanya kuti zyanaanjikha, akhabha ni mbombo iya kwanza umushi uwunji, akhanda kuzuyunguula musanya wonti. UKalulu woope ivubhi lyámulemile akhapotwaga nziila na kusupiila utulo. Inge adaamukha ni ndaabhi ishilaabhila yáamile mbombo kubhuziilizya kwe uBhūubhi abhalile. fleelo atakhanzaga kuti bhajendaje peeka khaala. UBhūubhi akhamwaga umushi uwamwabho. Isiku lye aabhala kukwa, bhakhamugojela inkuku. UBhūubhi we akwanda kulya bhūulo, uKalulu akhakhoma ihoodi mu shilyango. UBhūubhi we amulola akhaponaga kuti agazilikha, umwoyo wukhati ng’aa! Akhayeetwa nhaani, akhanda kubheelula amiiso inze we akwanza kuzilikha. Woope uKalulu we ayaaga uBhūubhi akulya inkuku, ulukelo lukhanda kubhobha ungati mpungo iyi nzegema,

akhayingaga na kutwinha akhapootwa nziila kujimba. Akhabhabhũzya akhati, “Wũũũyo ali ni shizilisi, mwenyaaji she akubheelula amiiso gaakwe.”

Abhantũ bhaala bhakhamusiita uBhũũbhi, yooli bhakhamũgana uKalũũ kũti we abhe mukolimwa waabho. UBhũũbhi akhayisiibhaga na kũti jibha agayipinyiila akhati, “Maanyi inhonzye bhuli na Kalũũ unũ.” Akhayilonga nimfwa uBhũũbhi akhati, “Jibha ineeje umũshi kũmwanya, pe angapootwa kũsonganya mwe?”

UBhũũbhi akheega ulukusa akhanda kũzũbha kũmwanya kũti abhale ayanze umũshi, fwani uKalũũ áamile pe atizũbhile. Ulukusa lwa Bhũũbhi lwafumile paasi paka kũmwanya. Wooke uKalũũ akhanda kujenda mu lukusa lwa Bhũũbhi. UBhũũbhi zyamusyobhile, atamanyile kũti uKalũũ agazũbha mu lukusa lwakwe. We aafikha kũmwanya akhamwaga umũlindu umwinza nimfwa. Bhakhitinhana kũti ayande na kukwa. UBhũũbhi akhasha nimfwa akhatinji kũmwanya kwe uKalũũ atagabhala kuvubhanya khaala. We bhaamala bhalagana, uBhũũbhi we akufuma kunzi akhaaga uKalũũ akwinjila mu shilyango. UBhũũbhi akhagaandũkha nimfwa akhalonga lyeka akhati, “Umuntu unũ afumila kwoshi?” UKalũũ she abhalamũkha bhũũlo akhanda kuvubhanya. We akũjendelela kuvubhanya, uBhũũbhi she ali panzi atakhalaga na kũlaga khaala, akhasogola akhabhũnganya ulukusa lwakwe akhanda kwikha paasi. Abhantũ bhaala awinza bhakhamũgana uKalũũ, bhakhamũkhaana uBhũũbhi we bhámwitishile kũwandilo.

Bhakhitinhana zyonti zye uKalũũ alonjile bhakhati akhinzaje kukwa, bhakhalagana uKalũũ akhafuma panzi. We akũti atale kwikha akhaaga uBhũũbhi asogooye nu lukusa lwakwe. UKalũũ akhakwina she atiyiishe paasi akhapootwa. Pe akhanza injeele iya kũti abhantũ bhaala bhapote ulukusa. Bhakhapota, bhakhapinya amakutwe. Ulukusa luula bhápotile umwezi weeka. We bhanda kumwisa akhati, “Inge nayingaana mũkhakwesaje we naaga kwe inkũbhala kutali.

Bhakhapinya amakutwe bhakhamwisa akhaaga kutali akhayinzanya bhakhamũzũvwa winza. Pe akhati, “Tũbhalaabhe abhapalamani na bha lyanhanda kũpota winza, bhakhapota

umwezi weeka wukhasila.” ƲKalulu akhabhabhuzya abhantu bhaala akhati, “Ishi mwebheya inge nayinzanya mukhaleshezyaje bhulo.” Bhakhamupinya amakutwe, ula we akupinya jibha akhapinya akhabhiibhi, we paabhobha ƲKalulu akhaviitwa akhanda kuti, “Abhapalamani bhiinyu ibha bhakunsekha, pe ileelo ine intibhalonje bhafwe wa musanyunu.” Abhantu bhaala bhátamuseshile naakhamu. We bhaatala kumwisya ƲKalulu akheenyanya paasi akhaaga kwe akubhala kutali, akhanda kuyinzanya itwe. Abhantu bhaala bhakhakumbukha kuti atili inge nayinzanya itwe mukhaleshezyaje, bhakhaleshezya ulukusa luula. ƲKalulu akhalenda paasi ku khati puu, akhazilikha, akhalaatula amiiso, goope amakutwe gakhanyuntikha gakhabha matali inze ulukusa. We pakhaabha inhaani pe akhazyakha, kwanda panaapo ƲKalulu amakutwe gakhabha matali na miiso gakhabha mapiti.

Akhaapango ikha khakutumanyizya kuti, abhantu abhi vubhi nu lakelo bhakuleeta uwufwe ni vilema mu nhaaya.

9. AKHAPANGO AKHA BHANTU BHABHILI

Umwanha umo kwámile na bhantu bhabhili amataawa gaabho, umo áamile wu Nkusomvwa, uwamwabho áamile wu Nalamba. Bhonti bhámile bhantu bha pa nhaaya yeeka, bhantu bhe bhámanyishile nimfwa. Isiku limo uNkusomvwa álemile intaafu inyinji nimfwa. Akhanishila zyenezyo pa khasanya pe khalamile. We ayanihila intaafu ziila akhinjila mu nyumba kulya uwugali.

Pe we ayiikuta vwafikha pa nsingo akhati, “Anheele imbale kwotela akhasanya kunzi kwe inanishiye intaafu zyani.” Pe we akufuma, akhalola imbwa yikulya intaafu zyakwe. Imbwa yiila yáli ya Nalamba. Kwe kuti unalamba áali muntu we akhabhingaga. Áamili ni mbwa inyinji nhaani zye zikhamwavwaga ku mbombo yaakwe iyo. UNkusomvwa akhakhooela we ayilola imbwa yiila akhati, “Bheebhee! Imbwa yaamala intaafu zyani bhaa! Imbwa yiniini ya naanu? Imbwa nyeene amasepe gaakwe mazyila, ulusinda lutali, kumwanya lutali na masepe khaala, imbwa ya naanu mwee!” Akhayibhunanzya nimfwa.

Abhantu bhe bhámile papiipi bhakhayimanya imbwa yiila bhakhati, “Imbwa yiniyo ya Nalamba.” UNkusomvwa akhabha she akulonga kuti, “UNalamba unu inkumusomvwa, kusomba kwakwe intiti, agoje imbwa yaakwe.” Akhabhala kwa mulonzi we akulonganya inongwa akhati, “Weeya nalamba, mbilishilile uNalamba, ayinze ni mbwa yaakwe.” Umulonzi ula akhamubhilishila uNalamba akhati, “Nalamba uyinze ni mbwa yaakho iya masepe amazyila nu lusinda lutali na masepe khaala, luguluulu bhulo.”

UNalamba akhabhala ni mbwa yaakwe kwa mulonzi wi nongwa. We aafikha bhulo, akhamwaga uNkusomvwa ali pupo. Akhayikwina nimfwa kuti khooni khe khafumiiye, khe woose uNkusomvwa ali panaapa, ileelo kumiiso aswimiliye bhulo? She akujendelela kuyibhuzilizya, akhaaga inongwa yaamela impembe. UNkusomvwa akhanda kulonga akhati, “Uwamwitu uNalamba imbwa yaakwe inzyila, yili nu lusinda ulutali, kumwanya luguluulu, yiliiye intaafu zyani pe inanishiye.”

Umulonzi akhati, “Pe ukutibhuli Nkusomvwa.” UNkusomvwa akhati, “Ine inkuti ansombe.” Umulonzi akhamubhuzya uNalamba akhati, “Weeya wimvwa she uNkusomvwa alonga?” UNalamba akhitishila akhati, “Nimvwa.” Umulonzi akhabhuzilizya akhati, “Pe ukutibhuli twenyi longa.” UNalamba akhati, “Nayooli, intakunjile imbwa khaala, inkulamba antuyile, inongwa ye injaajile.”

Umulonzi akhamubhuzya uNkusomvwa akhati, “Uwamwinyu akulamba, iwe pe ukutibhuli?” UNkusomvwa akhati, “Ine inkuti ansombe, inga intamusomvwa anza kulubhila na ku bhanji bhulo. We akusuga akhantu uyipimaje, nakuti utizubhilaje akhooni utangabulushila ivwa bhantu khaala.” Umulonzi akhamubhuzya uNkusomvwa, “Pe pima akusombe akhooni.”

UNkusomvwa akhati, “Agoje imbwa yaakwe, we ansomba aamala.” Akhalongaga ku mabaado nimfwa ngati weene muntu we zitangamwaga naazimo mu nsi umu. Abhantu bhe bháamile paala bhakhalinga kulamba, bhakhapootwa nzila, bhakhaaga atakulambikha.

Umulonzi akhajendelela akhati, “Nalamba wimvwa?” UNalamba akhati, “Nimvwa,” kumo amansozi gawkikha, she áyiganile imbwa yaakwe. Kwe kuti yikhabhingaga nhaani, ye yámulemile pakhaaya yaakwe. Iwinza pe akhaamula akhati, “Inkulamba imbwa ini ye ataagoje khaala. Imbwa ini ye yindemile pakhaaya, kabhili ye yikulwa nhaani. Usindi wope ataabhala naapamu we yilemile khali. Zyonti she mpenga izi inkubana zylenezo na khabhiibhi nhaani. Inkulamba ma muntuwe, intaafu tukhayisebha izinji, inhayikusomba.”

Umulonzi akhamubhuzya uNkusomvwa akhati, “Uwamwinyu bhaati akulamba umutuyile, akhakusebhele intaafu izinji, akhakusombe, imbwa ye utakhaagoje, ukuti bhuli?” UNkusomvwa akhitishila akhati, “Intakwimvwana nimwe khaala lyoli agoje yi mbwa, we ansomba.” Pe leelo bhakhanda kudalinhana uNalamba nu Nkusomvwa, bhakhadalinhana, bhakhadalinhana paka uNkusomvwa akhagoga imbwa ya Nalamba ye yáali lusubhilo, kwe aabhala kubhinga kukunwa kwáli naakumo. UNalamba akhasogola akuyibhunanzya.

She ameezi gashiili kushila aminji nhaani, pa nzala pakaasi. Umwana wa Nkusomvwa akhalemwa mu shanga sha Nalamba, akubhanza amangaaga. UNkusomvwa aali muntu wi nzala wiila bhulo, akhagulilaga twa tunongwa kulisya abhaana bhaakwe. UNalamba akhamutwala kwa mulonzi kwe uNkusomvwa agojeeye imbwa yaakwe. We aafikha akhati, “We mulonzi niine namulema umwana wa Nkusomvwa mu shanga shaani akwibha amangaaga gaani. Niine weeya mulonzi, mubhilishile uyise ayinze ipa, agoje umwana waakwe, niine she inkwenya anza she agojile imbwa yaani. UNalamba akhalongaga kumo, amati gakhafumaga mwi lomu, she umulakha wamubudile ku nsingo.

Umulonzi akhamubhuzya uNkusomvwa zyonti zye uNalamba akulonga akhati, “Bhaati niwe goga umwana waakho. Nkusomvwa wimvwa?” Akhamubhuziliza. UNkusomvwa akhati, “Nimvwa.” Kumo akuyinga, we akumwenya umwana waakwe.

Umulonzi akhati, “Nkusomvwa wimvwa?” Akhitishila akhati, “Inkati antuyile pe lisiku lya kwanda.” UNalamba akhalonga akhati, “Niine imbwa yaani lyamile lisiku lya kwanda. Niwe goga panaapa.”

UNkusomvwa wope akhagoga umwana waakwe akhati, “Te inhapwanizye naalumo kusomvwa abhantu, naswila pa lwinga, kufuma umusanyuunu, dumu.”

Akhapango ikha khakutumanyizya twetwe kuti, tutayiganaje kusomvasomvwa abhamwitu inga bhatutulila inongwa. Kwe kuti ukusomvwa umusanyuunu, indaabhi niwe zikubha papaakho, ukutala kuswiga bhulo. Inongwa mangwe. Umuntu wowonti akwonya. Mwebheya, fwani kutuyilana kwe kwinda kushila ulusomvwo.

10. AKHAPANGO AKHA MBIIDA

Imandi áliipo umuntu umo itaawa lyakwe áamile wu Mbiida, ápeliilwe nu Múlungu akhinza. Áali muntu umo we mwinza nhaani. Nalyoli we ukwenya, akhalolekhaga kuti mwinza. Kufuma ku wunsi waakwe áamile mwinza. We aakula abha mutunta bhúulo, abhi nhaaya yiila yonti bhakhanda kuswiga nawo she mwinza. Pe uMbiida amanha gaakwe aga kwega umushi gakhafikha. Abhalindú bhámuganile nhaani, wowonti we áamile mwana mulindú akhatinji, “Umusakhaala uyo anganeega neene, ingasha nhaani.”

Woope uMbiida atakhanzaga kuti angeega nalubhilo umushi. Atakhatuyaga ngakheeka, ámanyile kuti isiku inga lye ati umusanyuunu akwega te akhayimbe khaala, yeenya bhonti bhamuganile inhaani.

Tubhantu tukujenda ni nsiku. Abhalindú bhakhanda kukhatampa, bhakhalola akubheena bhúulo, atakulinga poope kulonga nabho khaala. Abhalindú bhakhati, “Jibha atakutugana inga lyeka.” Impuga iya bhalindú we bhaaga fwani atakulonga na woope nuamo bhakhati, “Jibha ashili kukula akhinza, tumwenyeelezye asuti.” Bhamu bhakhalinga kumubhuzilizya kuti, “We Mbiida umushi te ukheeje khaala?”

UMbiida akhatinji, “Inshiili kukula.” Panaapo abhalindú bhaala bhe bhákulile peeka nawoope, bhakhamugulila bhakhapootwa, bhakhanda kwanza abhasakhaala bhonti. Pe na bhasakhaala bhe bhákulile peeka nu Mbiida, bhonti bhakheega abhashi, akhasyala wuuyo mwene. Áamile she akuyilola nu winza waakwe, abhalindú bhonti bhakhakhatampa, bhakhalekha na kumusibha.



Pe we adiila, insiibho yikhamwaga kuti woope ayeeje umushi. UMbiida akhanda kwanza abhalindu. Pe akhalola kuti woope insiku zafikha kuti ayeeje umushi. Abhalindu bhonti bhe bháli bhinza, abhanji bhakheega bhenebho. Peeka ni baado lye áamile nalyope akhaswiga nhaani, we ayaaga akwanza kubholela.

Abhalindu bhakhapela bhaguula bhapootwa, bhakhalola kuti atali wuuyo mwene khaala, bhakhasha bhulo kwejlwa na bhasakhaala abhanji. Akhajenda mwi syila na mu masyila, akhapootwa nziila. UMbiida atakhabha nu wushevu ingaweeka akhati, “Abhalindu bhonti bhe bhinza abhanji fwani bhakheega bhonti, maanyi inhonzye bhuli!” Pe akhamwaga umulindu weeka we álemaaye ivinama vwakwe vwonti, na bhasakhaala abhanji bhakusiita kumwega, yikhalolekha kuti uMbiida ayeeje wunuyo. Ge mayimba kwa muntu we akuyilola kuti mwinza, abhanji bhatangabha anza weene. Akhatata kuyimba nimfwa nu mushi uwa shilema isha vinama. Ku liizi umushi uyo akhapotwaga kubhala, kwope ku vwizi ukutali yáli mbombo kuyagaata.

Akhapango ikha khakutumanyizya kuti tutabhanje ni baado khaala, poope ugabha we mulindu niwe ugabholela. Akhantu khokhonti tubhombaje paala apakuti khabhombwe, inga wadiila nhaani kubhomba khakunanjikha.

11. AKHAPANGO AKHA NSHOOLANYO

Áliipo umuntu umo áamile ni baado ipiti nimfwa. Itaawa lyakwe bhakhatinji wu Nshoolanyo. Áamile mukenja, iweene áamile ni mbombo iya kushoolanya abhashi bhe abhamwabho bheega. Isiku limo uNkwenya akheega umushi. Umulindu ula áamile mwana wa Nkupaapa.

UNshoolanyo akhimvwa kuti uNkwenya ayeejile umushi, umwana wa Nkupaapa. Akhasekha nimfwa paka akhagalagaata na paasi akhati, “Yooli mwebheya, abha Nkwenya pe bhapootwa kwanza abhalindu abha kwega, paka aabhala kwega abha Nkwitikha bhulo.”

UNshoolanyo akhati, “Abha Nkwitikha bhe tukuti abhalindu abhabhiibhi mu nsi ini. Poope umuntu angati abhiishe inzumbi nu mulindu unu uNkwitikha kwomo pe ineegaje inzumbi, poope she ya mwi laala mansi.” UNshoolanyo uweene ye yámili mbombo yaakwe kushoolanya na kusipanya kwe abhamwabho bheega na bhalindu kwe bheejelwa.

Isiku limo akhati, “Ine inga inkwega umushi, inhayeeega umulindu we inga naashila nawo pa bhantu, bhakhasyalaje amiiso gaabho gakubhabhobha ni nsisi zikhapenyukhaje mu matwe gaabho.” Weeya uNshoolanyo nayooli akhapela akhaswigo pa khakhaaya khaabho na ku bhantu bhonti. Akheega umushi we akulama ungati lizubha, abhantu bhakhati, “Mwebheya uNshoolanyo anza she alongaga, nayooli ayeejile umushi, akulama ma bhantu mwe! Inga weenya na miiso gakubhobha.”

Umushi waakwe itaawa áamile wu Nkuganwa. Isiku limo ilyantanda nyeene likhalinga likavwalanganya pa khakhaaya khaala, akhasuuto khakhatukukhaga. Fwani ayeejile ilyantanda lye nziila bhulo. Pamiiso akhalamaga, anheele leelo izya ku mwoyo zye lyámili nazyo, fwani masusu, likooko. Weeya ilyantanda nyeene fwani lyibha, iwinza libhembu, litakukhaana abhasakhaala, likwitikha bhulo.

Iweene uwuyanzi, kulumanya, uwulozi, ilenga, uwakhata peeka nu wiimi, zye zyámile mbombo zyakwe. Pe abhantu bhakhakhoolela bhakhati, “UNshoolanyo ilyantanda lye atuleteeye twapootwa. Tumabhilishile UNshoolanyo peeka ni shi lyakwe, tumabhuzye abhinje lyenelyo pakhaaya ipa.”

Bhakhambhilishila UNshoolanyo ni shi lyakwe bhakhati, “We Nshoolanyo, uyikhaaye bhulibhuli ni shi liniili? Lya kwoshi liniili?” UNshoolanyo akhati, “Mwebheya, injimbile wujimba ni lyantanda ili, niine naalita nalyo, ileelo inkuyibhuna pamiiso she likulama.” UNshoolanyo akhonjeelezya akhati, “Jibha lyomo lisogolaje ishi pe intibhuli, lyajinia! Kwomo imfuute.”

Abhantu bhakhambhuzya bhakhati, “Ukhatusekhaga itwe we tukwega, ishi pe weega leelo, wafundwa, ukhapwanile!” UNshoolanyo akhati, “Fwani umushi te papamiiso khaala, yooli injendo zyakwe ni mbombo zyakwe izya ma mwoyo inge nyinza, uyo we mwantanda. Poope abhe mwilu tika, abhe ni lyiso lyeka, poope abhe ni nshende mansi. Heelo injendo zyakwe inga nyinza, uyo we mushi.”

Akhapango ikha khakutumanyizya kuti, “Weeya, utakhaaseshe umushi wa wamwinyu, awe umulume wa wamwiinyu. Anza kwaga uwaakho, fwani we munanjisu nziila.”

Kama una maswali yoyote, au unataka kununua
vitabu, au kuhudhuria darasa la kusoma,
wasiliana kwa:

Namba za simu

0756 474 187 au 0715 271 270

